

Na osnovu člana 9. stav (2) Programa subvencionisanja boravka djece u predškolskim ustanovama na području Tuzlanskog kantona, broj: 02/1-34-17003-2/26 od 25.06.2026. godine i broj: 02/1-34-17003-5/26 od 24.07.2026. godine, Ministarstvo obrazovanja i nauke Tuzlanskog kantona, objavljuje:

JAVNI P O Z I V
za subvencionisanje boravka djece u predškolskim ustanovama na području
Tuzlanskog kantona

I

Raspisuje se Javni poziv za subvencionisanje boravka djece sa područja Tuzlanskog kantona u predškolskim ustanovama (u daljem tekstu Ustanova) za ukupno 800 korisnika.

Boravak djeteta u ustanovi u smislu ovog Javnog poziva je korištenje usluga odgoja, njege i obrazovanja koje djetetu pruža Ustanova u okviru cjelovitog razvojnog programa (cjelodnevnog) i programa produženog boravka.

II

Ukupna visina subvencije iznosi 1.000,00 KM po jednom korisniku a isplata subvencije će se vršiti putem Ustanove sa kojom korisnik ima zaključen ugovor.

Korisnik može ostvariti pravo samo na jednu subvenciju bez obzira na broj djece korisnika predškolskog uzrasta koja koriste usluge Ustanove.

III

Pravo na dodjelu sredstava ima kandidat, pod uslovima:

- a) da je državljanin Bosne i Hercegovine,
- b) da ima mjesto prebivališta na području Tuzlanskog kantona,
- c) da u domaćinstvu ima jedno ili više djece predškolskog uzrasta koja koriste usluge Ustanove,
- d) da posjeduje Ugovor sa Ustanovom za dijete/djecu koje/a koristi/e usluge Ustanove u minimalnom trajanju od sedam mjeseci tokom pedagoške 2025/2026. godine, s tim da je predmetni ugovor na snazi odnosno da dijete/djeca pohađa/ju program iz tačke I stav 2. ovog Javnog Poziva u vrijeme raspisivanja Javnog poziva,
- e) da do momenta podnošenja prijave nema neizmirenih obaveza prema Ustanovi,
- f) da u pedagoškoj 2025/2026. godini nije bio korisnik sredstava za namjene finansiranja/sufinansiranja troškova smještaja i boravka djece u predškolskim ustanovama odobrenih iz Budžeta Tuzlanskog kantona,
- g) da u pedagoškoj 2025/2026. godini rad Ustanove i provođenje programa predškolskog odgoja i obrazovanja u Ustanovi (u pogledu isplate plata zaposlenika (bruto), naknada i drugih materijalnih prava koja nemaju karakter plata, materijalnih troškova, nabavke osnovne opreme i učila, potrošnog materijala za odgojno-obrazovni rad, amortizacije i tekućeg investicionog održavanja objekata, dijela radno-igrovnog materijala (igračke i drugi osnovni didaktički materijal), kao i drugih finansijskih troškova koji su neophodni za provođenje programa predškolskog odgoja i obrazovanja) u kojoj boravi dijete/djeca korisnika nije finansiran/sufinansiran na bilo koji način (grant, transfer ili drugi oblik finansiranja) iz budžeta općine/grada na području Tuzlanskog kantona.

IV

Kriteriji za dodjelu subvencije

Rangiranje kandidata za dodjelu subvencije vrši se u skladu sa sljedećim kriterijima:

- a) visina mjesečne naknade koju korisnik plaća Ustanovi za jedno dijete za programe iz tačke 1. stav (1) ovog Javnog Poziva;
- b) visina mjesečnih primanja koje ostvari domaćinstvo;
- c) broj djece korisnika koja koriste usluge predškolskog odgoja i obrazovanja u Ustanovi.

Po osnovu visine mjesečne naknade koju korisnik plaća Ustanovi, kandidat može ostvariti sljedeći broj bodova:

- a) za plaćanje naknade u visini od 250 KM 350 broj bodova koji se ostvaruje je 10,
- b) za plaćanje naknade u visini od 351 do 450 KM broj bodova koji se ostvaruje je 30,
- c) za plaćanje naknade u visini od 451 i više KM broj bodova koji se ostvaruje je 50.

Korisnik može ostvariti sljedeći broj bodova u odnosu na visinu mjesečnih primanja koja ostvari domaćinstvo kako slijedi:

- a) za primanja u visini preko dvije prosječne plaće u Federaciji Bosne i Hercegovine, prema objavljenom podatku Federalnog zavoda za statistiku koji je važeći na dan objave Javnog poziva, broj bodova koji ostvaruje je 10,
- b) za primanja u visini između jedne i dvije prosječne plaće u Federaciji Bosne i Hercegovine, prema objavljenom podatku Federalnog zavoda za statistiku koji je važeći na dan objave Javnog poziva broj bodova koji ostvaruje je 30,
- c) za primanja u visini do jedne prosječne plaće u Federaciji Bosne i Hercegovine, prema objavljenom podatku Federalnog zavoda za statistiku koji je važeći na dan objave Javnog poziva broj bodova koji ostvaruje je 50.

Korisnik ostvaruje po 5 bodova za prvo i drugo dijete a 10 bodova za treće i svako naredno dijete koje koristi usluge predškolskog odgoja i obrazovanja u Ustanovi.

V

Prijave na Javni poziv sa potrebnom dokumentacijom, podnose se Ministarstvu obrazovanja i nauke Tuzlanskog kantona, u roku od 30 dana od dana objavljivanja Javnog poziva na internet stranici Vlade Tuzlanskog kantona (www.vladatk.kim.ba) i Ministarstva obrazovanja i nauke Tuzlanskog kantona (www.montk.gov.ba).

Prijava na Javni poziv vrši se putem prijavnog obrasca, koji se može preuzeti na internet stranici Vlade Tuzlanskog kantona i Ministarstva obrazovanja i nauke ili u službenim prostorijama Ministarstva obrazovanja i nauke Tuzlanskog kantona.

VI

Kandidat je uz popunjen prijavni obrazac obavezan dostaviti i:

- 1) Uvjerjenje o državljanstvu za korisnika ne starije od 3 mjeseca od dana objave Javnog poziva (original ili ovjerena kopija) ili ovjerena kopija važeće lične karte,
- 2) CIPS obrazac PBA3 za korisnika i za svako dijete koje boravi u Ustanovi, ne stariji od 3 mjeseca od dana objave Javnog poziva (original ili ovjerena kopija),
- 3) Izvod iz matične knjige rođenih za svako dijete koje boravi u Ustanovi ili drugi dokaz kojim se dokazuje svojstvo korisnika (original ili ovjerena kopija),
- 4) Ugovor sa Ustanovom o smještaju i boravku djeteta u Ustanovi važeći u vrijeme raspisivanja Javnog poziva. Ukoliko postoje dva ili više ugovora za isto dijete potrebno je dostaviti sve ugovore (original ili ovjerena kopija),
- 5) Potvrda Ustanove sa kojom je potpisan Ugovor da dijete koristi usluge Ustanove sa navedenom vrstom usluge odnosno programom koje dijete pohađa i naknadom koju korisnik plaća na mjesečnom nivou za tu uslugu te da korisnik nema neizmirenih obaveza prema Ustanovi za vrijeme trajanja Ugovora sa navedenim ukupnim iznosom plaćenih troškova po

Ugovoru (treba da sadrži i sljedeće podatke: ime i prezime i JMBG korisnika i djeteta koje boravi u Ustanovi i broj ugovora koji je potpisan sa Ustanovom) (original),

6) Izjavu ovjerenu kod nadležnog gradskog/općinskog organa ili notara da korisnik u pedagoškoj 2025/2026. godini nije bio korisnik sredstava za namjene finansiranja/sufinansiranja troškova smještaja i boravka djece u predškolskim ustanovama odobrenih iz Budžeta Tuzlanskog kantona,

7) Potvrdu Ustanove sa kojom je potpisan Ugovor da u pedagoškoj 2025/2026. godini rad ustanove i provođenje programa predškolskog odgoja i obrazovanja u Ustanovi (u pogledu isplate plata zaposlenika (bruto), naknada i drugih materijalnih prava koja nemaju karakter plata, materijalnih troškova, nabavke osnovne opreme i učila, potrošnog materijala za odgojno-obrazovni rad, amortizacije i tekućeg investicionog održavanja objekata, dijela radno-igrovnog materijala (igračke i drugi osnovni didaktički materijal), kao i drugih finansijskih troškova koji su neophodni za provođenje programa predškolskog odgoja i obrazovanja) u kojoj boravi dijete/djeca korisnika nije finansiran/sufinansiran na bilo koji način (grant, transfer ili drugi oblik finansiranja) iz budžeta općine/grada na području Tuzlanskog kantona (original),

8) Izjava – kućna lista ne starija od 3 mjeseca od dana raspisivanja Javnog poziva ovjerena kod nadležnog gradskog/općinskog organa ili notara (original ili ovjerena kopija),

9) Dokaz o visini prihoda za korisnika i sve punoljetne članove domaćinstva koji su navedeni na kućnoj listi:

1. Potvrda poslodavca o mjesečnim primanjima za posljednja tri mjeseca od dana podnošenja prijave za sve zaposlene, odnosno Ček od PIO penzije za penzionisane punoljetne članove domaćinstva (original ili ovjerena kopija),

2. Uvjerjenje službe za zapošljavanje za sve nezaposlene članove domaćinstva ne starije od 30 dana od dana objave Javnog poziva (original ili ovjerena kopija), a ukoliko se isti ne vode na evidenciji službe za zapošljavanje Uvjerjenje iz ispostave Poreske uprave kojim se dokazuje status nezaposlenosti ne starije od 30 dana od dana objave Javnog poziva (original ili ovjerena kopija).

3. za lica koja imaju registrovanu samostalnu djelatnost: rješenje o registraciji obrta/srodne djelatnosti, obrazac 2002 o plaćenim doprinosima, za posljednja tri mjeseca i GPD i SPR obrasci godišnje prijave za 2025. godinu (original ili ovjerena kopija);

10) Samohrani korisnik dostavlja dokumentaciju kojom dokazuje taj status (Izvod iz matične knjige rođenih za roditelja ili druga dokumentacija kojom se dokazuje status samohranog korisnika (original ili ovjerena kopija).

Ministarstvo zadržava pravo provjere istinitosti potvrde iz tačka 7), te ukoliko utvrdi da su u istoj izneseni neistiniti navodi odbaci prijavu korisnika sa takvom potvrdom kao nepotpunu.

VII

Na osnovu odluke sa konačnom rang listom, ministar sa kandidatom zaključuje ugovor o dodjeli subvencije, kojim se bliže uređuju međusobna prava i obaveze.

Ugovor o dodjeli subvencije zaključuje se u roku od 20 dana od dana isticanja konačne rang liste na internet stranici Vlade Tuzlanskog kantona i Ministarstva obrazovanja i nauke.

Ukoliko kandidat, u roku navedenom u prethodnom stavu, ne potpiše ugovor, smatrat će se da je odustao od subvencije i gubi pravo na dodjelu subvencije a ista se dodjeljuje prvom sljedećem korisniku sa konačne rang liste korisnika koji nije ostvario pravo na dodjelu subvencije.

VIII

Javni poziv ostaje otvoren 30 dana od dana objavljivanja na internet stranici Vlade Tuzlanskog kantona i Ministarstva obrazovanja i nauke Tuzlanskog kantona.

Prijave na Javni poziv sa potrebnom dokumentacijom šalju se putem pošte preporučeno ili lično na adresu Centralne pisarnice kantonalnih organa uprave - ulica Fra Grge Martića 8, 75000 Tuzla, sa naznakom „Prijava na Javni poziv za subvencionisanje boravka djece u predškolskim ustanovama“.

Nepotpune i neblagovremene prijave, kao i prijave koje nisu sačinjene na prijavnom obrascu, neće se uzeti u razmatranje.

**Ministarstvo obrazovanja i nauke
Tuzlanskog kantona**